

Uhakika wa Ushindi

Ambaye alijitoa nafsi yake kwa ajili ya dhambi zetu, ili atuokoe na dunia hii mbovu iliyopo sasa, kama alivyopenda Mungu, Baba yetu. Wagalatia 1:4.

Kwa kutoa maisha Yake kwa ajili ya uhai wa ulimwengu, Kristo aliweka daraja juu ya shimo kubwa ambalo dhambi ilikuwa imelitengeneza, akiunganisha dunia hii iliyolaaniwa na dhambi na ulimwengu wa mbinguni kama jimbo moja.

Mungu alichagua ulimwengu huu kuwa ukumbi wa matendo Yake makuu ya neema. Wakati hukumu ya adhabu ilikuwa imening'inizwa juu yake kwa sababu ya uasi wa wakazi wake, wakati mawingu ya ghadhabu yalikuwa yakikusanyika kwa sababu ya kuvunjwa kwa sheria ya Mungu, sauti ya ajabu ilisikika mbinguni, "Tazama, nimekuja... kuyafanya mapenzi yako, Ee Mungu" (Zaburi 40:7, 8). Mbadala wetu na mdhamini wetu alikuja kutoka mbinguni akitangaza kwamba Ameleta pamoja Naye mchango mkubwa na wenye thamani isiyokadirika ya uzima wa milele. Msamaha unatolewa kwa wote watakaorejesha utii wao kwa sheria ya Mungu. Lakini kuna wale wanaokataa kukubali "Bwana asema." Hawatakuwa na kicho na heshima kwa sheria Yake. Wanafanya sheria ngumu za kibinadamu kinyume na "Bwana asema," na kwa amri na mfano wanawaongoza wanaume, wanawake na watoto kwenye dhambi. Wanazitukuza sheria zilizotungwa na wanadamu kuliko sheria ya Mungu. Lakini hukumu na ghadhabu ya Mungu zimening'inizwa juu ya wasiotii. Mawingu ya haki ya Mungu yanajikusanya. Vifaa vya uharibifu vimekusanywa kwa zama nyingi; na bado uasi, ukaidi na ukosefu wa uaminifu dhidi ya Mungu unaongezeka daima. Watu wa Mungu waliosalia, wanaoshika amri Zake, watalielewa neno lile lililonenwa na Danieli, "Wengi watajitakasa, na kujifanya weupe, na kusafika; bali wabaya watatenda mabaya; wala hataelewa mtu mbaya awaye yote; bali wao walio na hekima ndio watakaolewa." (Danieli 12:10).

Shetani ameuuta ulimwengu huu kuwa jimbo lake. Hapa ndipo mahali kiti chake kilipo na anawashikilia kuwa watiifu kwake wale wote wanaokataa kutunza amri za Mungu, wanaokataa maneno ya wazi, "Bwana asema." Wao wamesimama chini ya bendera ya adui; kwani kuna pande mbili tu duniani. Wote ama wamejipanga chini ya bendera ya watiifu au chini ya bendera ya wasiotii.

Yesu sasa anatuma ujumbe Wake kwa ulimwengu ulioanguka. Anapendezwa kuwachukua wale wanaoonekana kuwa hawawezi kuponyeka, wale ambao Shetani amewatumia katika kazi yake ili kuwafanya kuwa raia wa neema Yake. Anafurahi kuwaokoa kutoka katika ghadhabu ile itakayowaangukia wasiotii.